

1 TESALONAIKA

¹ Iga Pol na Sailas na Timoti na iga qalub anjam endi nengrenyosim ningi Tesalonaika qureq di loueqnub qaji nungoq qarinyonum. Ningi Tamo Koba Yesus Kristus aqa Abu Qotei wo nanngi aiyel beternjrejunub.

Qotei a ningi qa are boleiyimqa ningi lawo na soqniy.

Tesalonaika Kristen nanngi Yesus qa nanngo areqalo singilateb

² Iga gaigai ningi kalil qa pailyoqnsim Qotei binjiyeqnum. ³ Ningi Yesus qa nungo areqalo singilateqñub deqa ningi kumbra bole bole yeqñub. Osib ningi qalaqalaiyo kumbra dauryoqnsib wau bole ojeqñub. Mondor gago Tamo Koba Yesus Kristus a olo bqas. Ningi a qa tarinjoqnsib singila na tigelejunub. Iga nungo kumbra deqa are qaloqñsim gago Abu Qotei binjiyeqnum. ⁴ O ijo was kalil, Qotei a ningi aqa segi qa marsiq giltngej deqa a na ningi tulan qalaqalaingeqñu. Di iga qalieonum.

⁵ Iga nami Yesus aqa anjam bole nungoq osi bem. Iga laña anjam maro na osi bosai. Iga singila ti Mondor Bole ti areqalo bole ti dena osi bem. Ningi qalie, iga nungo ambleq di sosim kumbra boledamu yoqñsim ningi aqaryaingoqñem.

⁶ Ningi Qotei aqa anjam ojesoqñeb deqa gulbe gargekoba nungoq di brantoqñej. Bati deqa ningi gago kumbra ti Tamo Koba aqa kumbra ti dauryoqñeb. Ningi uratosaiogñeb. Mondor Bole na nungo areqalo tigeltetngoj deqa ningi tulan

areboleboleingooqnej. ⁷⁻⁸ Ningi Tamo Koba aqa anjam palonteqnab anjam di giloqnsiq Masedonia sawa ti Akaia sawa ti dia brantoqnej. Deqa sawa dia tamo ungasari kalil Yesus qa nanjo areqalo singilateq nub qaji nanji nunjo kumbra qa quonqnsib dauryeqnub. Sawa dia segi sai. Sawa sawa kalilq di dego ningi Qotei qa nunjo areqalo singilateb deqa saoqnsib laq nab tamo ungasari nanji quekriteqnub. Deqa unqum, iga aitentosisim nunjo kumbra deqa olo mare mare laqasai. ⁹ Iga nami nunjo ambleq di sonamqa bati deqa ningi gago anjam dauryoqneb. Nunjo kumbra deqa sawa sawa kalilq di tamo ungasari nanji saoqnsib laq nub. Ningi are bulyosib gisañ qotei nanji torei uratnjrsib Qotei bole agi nambile gaigai unu qaji a areiyosib waueteqnub. ¹⁰ Osib ningi Qotei aqa Njiri a lañ qureq na bqajqa deqa tarinjoqnsib unub. Nunjo kumbra deqa dego sawa sawa kalilq di nanji saoqnsib laq nub. Qotei aqa Njiri di agi Yesus. A moinaqa Qotei na olo subq na tigeltej. A na iga padalo sawaq na elenej deqa mondoñ Qotei aqa minjin oqwa bati boqnimqa iga aqa minjin di turqasai. Iga so bole gaigai sqom.

2

Pol a Tesalonaika Kristen nanjo ambleq di wau bole yoqnej

¹ O ijo was ningi segi qalie, iga nami nunjoq bosim nunjo ambleq di wauoqnem gago wau di laña ulonjosai. ² Ningi qalie, iga nunjoq bosaisosimqa iga Filipai qureq di Qotei aqa wau ojeqnam jeu tamo nanji na iga jaqatin

egoqnsib ugeugeigoqneb. Bunuqna iga nungo qureq bonamqa dia dego jeu tamo nanği na iga ugeugeigoqneb. Gago Qotei na gago are singilatetgej deqa iga jeu tamo nanği qa ulaosai. Iga singila na tigelooqnsim Qotei aqa anjam bole ninği merngoqnem. ³ Bati deqa iga ninği endegsi merngoqnem, “Ninği Yesus qa nungo areqalo singilatiy.” Iga anjam uge bei ninği merngosaiioqnem. Iga nungo ambleq di sosim kumbra jiga ti gisan kumbra ti yosaiioqnem. ⁴ Qotei a segi gago kumbra tenemtoqnsiq une bei unosaioqnej deqa a na iga wau egsiqa mergej, “Ninği ijo anjam bole mare mare laqniy.” O ijo was, mandam tamo nanği gago wau qa arearetnjroqnqajqa iga deqa are qalosaiioqnem. Iga endegsi are qaloqnem, “Qotei a segi gago are miligi peleiyoqnsim gago wau qa arearetoqnqas.” ⁵ Ninği qalie, iga walawala anjam bei ninği merngosaiioqnem. Osim nungo inği inği qa maulgonaq laņa gisan na anjam palontosaioqnem. Qotei a segi gago kumbra qa qalie. ⁶ Iga wauoqnem di ninği na kiyo tamo qudei na kiyo gago ñam soqtetgwajqa deqa wauoqnem e? Sai. Iga deqa wauosaiioqnem. ⁷ Bole, iga Kristus aqa wau tamo bole unum deqa iga ninği endegsi merngwa kere, “Ninği silali inği inği qa aqaryaigoqniy.” Ariya iga degyosai. Iga nungo ambleq di anğro kiñilala bul lawo na soqnem. Ai nanği na nanğo anğro mom nanği munğum anainjreqnub dego kere iga nungo ai bul sosim ninği gereinğoqnem. ⁸ Osim iga ninği tulan qalaqalainğoqnem. Deqa iga nungo silali inği inği yainğwajqa are qalosaiioqnem. Iga Qotei aqa

anjam bole ningi mernḡwajqa deqa are qaloqnem. Di segi sai. Iga gago segi ḡambile dego uratosim ningi aqaryaingwajqa are qaloqnem. Di kiyaaqa? Ningi gago Kristen was bole unub deqa.

⁹ O was ningi qalie, iga ningi koba na sosimqa Qotei aqa anjam bole mernḡoqnem bati deqa iga waukobaoqnem. Iga ningi gulbe enḡwa uratosim deqa gago segi ban na qanam ti qolo ti tulan siḡgila na wauoqnem. Osim dena gago segi inḡi inḡi awaiyoqnsim uyoqnem. Ningi iga silali qa aqaryaigwajqa deqa mernḡosaioqnem.

¹⁰ Ningi Yesus qa nunḡo areqalo siḡgilateqñub qaji iga na kumbra bole bole osornḡoqnem. Iga kumbra uge bei osornḡosaioqnem. Iga Qotei aqa ḡamgalaq di kumbra bole tintiñ nunḡo ambleq di yoqnem. Di ningi qalie. Qotei a dego qalie.

¹¹ Abu nanḡi na nanḡo anḡro nanḡi tingitñjroqnsib dalñjreqñub dego kere iga ningi tingitñḡoqnsim dalñḡoqnem. ¹² Iga ningi deḡḡoqnem. Di kiyaaqa? Ningi kumbra Qotei a tulan areareteqñu qaji di yoqnsib walweloqñqajqa deqa. Qotei aḡi a na ningi endegsi metñḡej, “Ningi ijoq babqa e nunḡo Mandor Koba sosiy ningi taqatñḡitqa ningi lan qureq di so bole gaigai sqab.”

Tesalonaika Kristen nanḡi gulbe qoboioqñeb

¹³ Iga Qotei aqa anjam ningi mernḡeqñam ningi quoqnsib endegsib are qalosaioqñeb, “Anjam di mandam tamo nanḡo anjam.” Sai. Ningi are qaloqñeb, “Bole, anjam di Qotei aqa anjam tintiñ.” Deqa bini Qotei aqa anjam di nunḡo are miligiq di siḡgila na waueqñu. Di kiyaaqa? Ningi Yesus qa nunḡo areqalo siḡgilateb deqa. Utru deqa iga

gaigai Qotei biñiyeqnum. ¹⁴ O ijo was, tamo ungasari Judia sawaq di Kristus Yesus aqa Abu Qotei wo qa loueqnub qaji nango kumbra agi ningi dau-ryeqnub. Tamo ungasari nangi di Juda nangi na gulbe koba enjroqneb dego kere nungo segi len qujai nangi na ningi gulbe koba engeqneb. ¹⁵ Juda nangi na Tamo Koba Yesus qalsib moi-yoteb. Nangi nami Qotei aqa medabu o qaji tamo nangi dego ñumoqnsib moi-yotnjroqneb. Osib iga dego wig-onab iga nungo qure uratosim jaraiyem. Juda nangi di kumbra Qotei a tulan areareteqnu qaji di gotranjoqnsib tamo ungasari kalil nangi jeutnjreqnub. ¹⁶ Osib iga na sawa bei bei qaji nangi Qotei aqa anjam minjrqa yeqnam gam getentetgeqneb. Qotei na sawa bei bei qaji nangi elenaim deqa Juda nangi na gam getentetgeqneb. Deqa nangi bati gaigai nango segi une tumbol ateqnub. Nangi kumbra degyeqnub deqa Qotei aqa minjin bosiq nangoq di unu.

Pol a Tesalonaika Kristen nangi olo unjrqaqqa are koba qaleqnu

¹⁷ O ijo was, Juda nangi na iga wige b deqa iga ningi uratngosim bati truquyala sawa beiq di soqnem. Deqa iga nungo ulatamu unosaieqnum. Ningi gago are miligiq di unub deqa iga ningi ti sobulejunum. Deqa iga nungoq olo bosim nungwajqa gam ngameqnum. Iga ningi olo nungwajqa are koba qaleqnum. ¹⁸ Od, iga nungoq olo bqajqa are unu. E Pol e segi bati gargekoba nungoq olo bqajqa yeqnam Satan na iga gam getentetgoqnej. ¹⁹ Mondon gago Tamo Koba Yesus a lan qureq na bamqa bati deqa iga ningi qa are singilatosim

Yesus aqa n̄amgalaq di tulan areboleboleigwas. Yim Yesus na mergwas, “N̄ingi ijo wau tamo bole.” O ijo was, bati deqa iga n̄ingi qa tulan areboleboleigwas. ²⁰ Od, bini dego iga n̄ingi qa tulan areboleboleigeqnu. N̄ingi na gago are tulan boletetgeqnu.

3

Pol a Timoti qarinyonaq Tesalonaika Kristen nan̄goq gilej

¹ Iga n̄ingi qa are kobaigoqnej. Deqa iga are qalem, “Ūngum, iga olo tarinqa keresai. Aqo Sailas wo Atens qureq endi sqom.” ² Iga degsi are qalsimqa Timoti qarinyonam n̄un̄goq gilej. Timoti a gago Kristen was bole. A Qotei aqa wau tamo. A Kristus aqa anjam bole maro qaji tamo. A n̄ingi aqaryaingosim n̄un̄go areqalo Yesus qa singilateqnu qaji di olo singilatetngwajqa deqa osim qarinyonam n̄un̄goq gilej. ³ Gulbe ti jaqatin̄ ti n̄ingi eqnu qaji dena n̄un̄go areqalo ugetetngaim deqa marsim Timoti qarinyonam n̄un̄goq gilej. N̄ingi qalie, Qotei a nami n̄ingi ti iga ti gulbe oqajqa marsiq giltgej. ⁴ Agi iga n̄ingi koba na sosimqa endegsi mern̄goqnem, “Gulbe gargekoba gagoq boqngas.” Mern̄geqnam gulbe agi gagoq di brantoqnej. Di n̄ingi qalie. ⁵ Utru deqa e tarinqa keresai. N̄ingi n̄un̄go areqalo Yesus qa bole singilateqnu kiyo sai kiyo di e qalieqajqa deqa Timoti qarinyonam n̄un̄goq gilej. E endegsi are qalem, walawalaiyo tamo Satan na n̄ingi uneq wain̄gonaqa n̄ingi gago wau lan̄a ulontosib n̄un̄go

areqalo Yesus qa singilato qaji di urateb kiyo? Degsi are qalsim are kobaiboqnej.

Timoti a olo bosiq Pol minjej, “Tesalonaika Kristen nanjo so bolequja”

⁶ Ariya Timoti a nunjoq gilsiq a olo uratngsiqa aqo Sailas wo gagoq di brantosiqa anjam bolequja endegsi mergej, “Tesalonaika Kristen nanji Yesus qa nanjo areqalo singilatoqnsib segi segi qa qalaqalaiyo kumbra yeqnub. Osib gaigai ninqi qa are boleinjreqnu. Ninqi nanji unjrqaqqa are koba unu dego kere nanji kamba ninqi nungwajqa are koba unu.” ⁷ O ijo was, ninqi Yesus qa degsib nunjo areqalo singilateqnu anjam di Timoti a bosiq aqo Sailas wo saigonaqa anjam dena gago gulbe kalil qa olo are singilatetgej. ⁸ Deqa iga qalieonum, ninqi singila na Tamo Koba aqa ñam ojejunub. Iga di qalieosim deqa bini iga so bole unum. ⁹ Iga ninqi qa are qaloqnsim deqa iga gago Qotei aqa ñamgalaq di tulan areboleboleiqnu. Gago arebolebole di tulan kobaquja. Qotei na arebolebole di iga egej deqa iga a binjiyeqnum. ¹⁰ Iga qanam ti qolo ti endegsim Qotei pailyeqnum, “O Abu, ni na odgimqa iga Tesalonaika Kristen nanjoq gilsim unjrjom. Unjrsim nanjo areqalo Yesus qa singilateqnu qaji di truquinjrimqa iga na olo singilatetnrjom.” Iga degsim Qotei pailyeqnum.

Pol a olo Tesalonaika Kristen nanjoq gilqajqa are qaleqnu

¹¹ Gago are koba endegsi unu. Gago Abu Qotei wo gago Tamo Koba Yesus wo nanji aiyel na gam waqtetgibqa iga nunjoq olo giljom. ¹² Gago areqalo bei dego agiende. Tamo Koba a na ninqi

aqaryaingimqa qalaqalaiyo kumbra nungoq di tulan kobaeme. Amqa ningi segi segi qa qalaqalaiyo kumbra yoqnsibqa tamo ungasari kalil nanqi dego tulan qalaqalainjroqniy. Agi iga na ningi tulan qalaqalaingeqnum dego kere. ¹³ Kumbra dena Qotei a nungo are miligi sinjilatetngimqa ningi aqa segi kumbra bole dauryoqnsib tamo ungasari tulan bolequja brantosib gago Abu Qotei aqa n̄amgalaq di une saiqoji soqniy. Soqniy mondon gago Tamo Koba Yesus na Qotei aqa segi tamo ungasari kalil nanqi lan qureq dena joqsim bqas. Bole.

4

Ningi sambala kumbra kalil torei uratiy

¹ O ijo was, kumbra bole kalil Qotei a tulan areareteqnu qaji di iga na nami ningi osorngoqnem. Kumbra di agi ningi dauryeqnub. Ariya bini iga nungo are miligi sinjilatetngosim Tamo Koba Yesus aqa n̄am na endegsi merngwom, “Ningi kumbra bole di olo torei sinjilatosib yoqniy.”

² Anjam kalil iga nami Tamo Koba Yesus aqa n̄am na ningi merngoqnem qaji di ningi segi qalie.

³ Anjam agiende. Qotei aqa areqalo agi ubtosiy marqai. Ningi aqa segi kumbra boleq di sosib sambala kumbra kalil torei uratiy. ⁴ Osib ningi nungo segi so geregere taqatiy. Ningi degyqab di ningi Qotei aqa segi kumbra boleq di sosib n̄am bole oqab. ⁵ Yimqa nungo areqalo uge uge na ningi titngosim sambala kumbraq di breingwasai. Ningi qalie, tamo ungasari Qotei qaliesai qaji nanqi sambala kumbra dauryoqnsib unub. ⁶ Ariya ningi

kumbra di uratiy. Niŋgi na nuŋgo Kristen was naŋgi kumbra uge bei osornjraib. Osib naŋgi gisaŋnjrsib naŋgo ŋaun ugetnjraib. Tamo Koba a na tamo ungasari kumbra uge deqaji yeqnuv qaji naŋgi awai uge enjrqas. Iga nami niŋgi siŋgila na degsi merŋgoqnem. ⁷ Qotei na iga kumbra jigat yqajqa metgosai. Iga aqa segi kumbra boleq di sqajqa deqa metgej. ⁸ Deqa tamo bei a gago anjam endi gotraŋyqas di a kumbra tulaŋ ugedamu yqo. A tamo naŋgo anjam gotraŋyosai. A Qotei aqa anjam gotraŋyqo. Qotei agi a na aqa Mondor Bole niŋgi eŋgeqnu.

Niŋgi qalaqalaiyo kumbra torei siŋgilatosib yoqniy

⁹ Niŋgi nuŋgo Kristen was naŋgi qalaqalainjreqnuv deqa e olo anjam bei totoryosiy nenŋrenyqasai. Qalaqalaiyo kumbra di Qotei na osornjekritej. ¹⁰ Agi niŋgi na Masedonia Kristen kalil naŋgi tulaŋ qalaqalainjreqnuv. Ariya ijo was, iga nuŋgo are siŋgilatetŋgimqa niŋgi qalaqalaiyo kumbra di olo torei siŋgilatosib yoqniy. ¹¹ Osib lawo na sosib nuŋgo segi iŋgi iŋgi taqatosib nuŋgo segi baŋ na wauoqniy. Anjam di iga nami niŋgi merŋgoqnem. ¹² Niŋgi degsib wauoqniyqa niŋgi iŋgi bei qa truquingwasai. Deqa tamo ungasari Yesus qaliesai qaji naŋgi nuŋgo kumbra di unsib tulaŋ areboleboleinjrqas.

Yesus a olo bosim tamo ungasari moreŋo qaji ti ŋambile unub qaji ti naŋgi koba na sqab

¹³ Ariya ijo was, tamo ungasari nami moreŋeb qaji naŋgi mondon kumbra kiye turqab di niŋgi qalieqajqa deqa merŋgwom. Yim niŋgi naŋgi qa

are gulbeinḡwasai. Tamo unḡasari Qotei qaliesai qaji nanḡi subq na tigelo bati qa tariḡosaieqḡnub. Deqa nanḡo was bei a moiḡas di nanḡi tulan are gulbeinjḡqas. Ariya ninḡi deḡsib are gulbeinḡwasai. ¹⁴ Yesus a moisiḡa olo subq na tigelej anjam di ninḡi iga ti gago areqaloḡ di siḡilatejunum. Deqa iga qalieonum, mondoḡ Qotei a tamo unḡasari kalil Yesus ombla sosib moreḡeb qaji nanḡi subq na tigeltḡnjrimqa nanḡi Yesus beteryosib koba na lanḡ qureḡ na mandamḡ aiqab.

¹⁵ Iga Tamo Koba aqa anjam ninḡi endegsi merḡḡwom. Mondoḡ Tamo Koba a mandamḡ aiyocḡnimqa iga ḡambile unum qaji iga na tamo unḡasari nami moreḡeb qaji nanḡi buḡnjrsim namo oḡsim Yesus itḡasai. ¹⁶ Qotei a anjam siḡila na marimqa lanḡ anḡro matu a leleḡoqḡnimqa Qotei a gul anjamḡas. Yimqa Tamo Koba Kristus a lanḡ qure uratosim mandamḡ aiyocḡnimqa tamo unḡasari nami Kristus qa nanḡo areqalo siḡilateḡsib moreḡeb qaji nanḡi namo subq na tigelqab. ¹⁷ Tigelabqa bati deqa iga ḡambile unum qaji iga ti nanḡi ti turosim koba na lanḡbiq na oḡsim Tamo Koba a itḡom. Osim a ti gaigai sqom. ¹⁸ Deqa ninḡi anjam di Qotei aqa tamo unḡasari nanḡi minḡroḡnsibqa dena nanḡo are siḡilateḡnjroḡniy.

5

Yesus a bqajqa bati tamo bei a qaliesai

¹⁻² O ijo was, Tamo Koba Yesus a bati gembu bqas di tamo bei a qaliesai. A bqajqa bati di bajinḡ tamo bul brantḡas. Bajinḡ tamo nanḡi qolo beḡḡnub

dego kere Yesus bqajqa bati di lumu brantosim tamo ungasari nanqi prughtnrqas. Ningi di qalie deqa iga olo anjam bei totoryosim nengrenyqasai. ³ Yesus a bosaisoqnmqa tamo ungasari gargekoba nanqi endegsib maroqnqab, “Iga so bole unum. Iga inqi bei qa ulaqasai.” Degsib maroqnbqa gulbe kobaquja nanqoq di brantoqujatqas. Unja angtrotqa osiq jaqatin eqnu dego kere. Gulbe di nanqi britosib jaraiqa keresai. ⁴ Ariya ijo was, ningi ambruq di sosai deqa Yesus bqajqa bati di bajin tamo bul bqas dena ningi prughtngwasai. ⁵ Ningi kalil pulon aqa angro. Ningi suwan aqa angro. Iga qolo qaji tamo sai. Iga ambru qaji tamo sai. ⁶ Deqa iga nerenjo ani tamo nanqi bul sqasai. Iga nam atoqnsim areqalo bole ti sqom. ⁷ Iga qalie, tamo nanqi nerenjqnub qaji nanqi qolo nerenjqnub. Tamo nanqi ya uge uyoqnsib nanarieqnub qaji nanqi qolo ya uyeqnub. ⁸ Ariya iga suwan qaji tamo unum deqa iga areqalo bole ti sosim Qotei qa gago areqalo singilatoqnsim qalaqalaiyo kumbra yoqnqom. Gago kumbra di iga qoto qa gara jugo bul jigsim tigelesqom. Osim Qotei na iga padalo sawaq na elenqajqa deqa tariñoqnqom. Gago kumbra di iga qoto qa gate tatal bul atsim tigelesosim nam atoqnqom. ⁹ Qotei na iga aqa minjin turqajqa giltgosai. Gago Tamo Koba Yesus Kristus na iga elenqajqa deqa giltgej. ¹⁰ Yesus a iga qa moiyej deqa iga mandamq endi sqom kiyo iga moiqom kiyo di unqum. Iga Yesus a koba na nambile gaigai sqom. ¹¹ Deqa ningi segi segi na Qotei aqa tamo ungasari nanqi anjam bole minjroqnsib dena nanqi singilatnjqroqniy. Agi bini ningi degyeqnub.

Niŋgi kumbra bole bole yoqniy

¹² Ariya ijo was, iga na niŋgi endegsi mernḡwom. Niŋgi nuŋgo Kristen gate naŋgo sorgomq di soqniy. Tamo Koba a na naŋgi gate ateleŋej deqa naŋgi niŋgi aqaryainḡwajqa waueqnuḡ. Wauoqnsib Qotei aqa anjam niŋgi mernḡoqnsib nuŋgo kumbra tingitetḡgeqnuḡ. ¹³ Naŋgi wau di yeqnuḡ deqa niŋgi naŋgi qa are boleinḡoqnim naŋgi qalaqalainjroqniy. Osib niŋgi nuŋgo Kristen was kalil naŋgi koba na are qujaitosib soqniy.

¹⁴ O ijo was, iga nuŋgo are tigeltetḡgimqa niŋgi kumbra endegyiy. Niŋgi na tamo uŋgasari wauqajqa asḡinjreqnu qaji naŋgi tingitnjroqniy. Osib tamo uŋgasari are gulbeinjreqnu qaji naŋgi siŋgilatnjroqniy. Tamo siŋgila saiqoji unub qaji naŋgi dego aqaryainjroqniy. Osib tamo kalil naŋgi lawo na gereinjroqniy.

¹⁵ Tamo qudei naŋgi niŋgi kumbra uge eŋgibqa niŋgi na kamba olo kumbra uge enjraib. Niŋgi na gaigai nuŋgo Kristen was naŋgi ti tamo uŋgasari kalil naŋgi ti kumbra bole osornjroqniy.

¹⁶ Osib niŋgi gaigai areboleboleinḡim soqniy. ¹⁷ Sosib gaigai pailyoqniy. ¹⁸ Kumbra kiye nuŋgoq di brantoqnim, di uŋgum, niŋgi olo Qotei biŋjiyoqnsib minjoqniy, “Ni keretonum.” Qotei aqa areqalo agiende. Niŋgi Kristus Yesus beteryesosib degyoqniy.

¹⁹ Qotei aqa Mondor na niŋgi wau bei yqajqa are tigeltetḡgimqa niŋgi olo getentaib. Niŋgi wau di yiy. ²⁰ Qotei aqa medabu o qaji tamo naŋgi na anjam mernḡoqniḡbqa niŋgi naŋgi qa olo are ugeinḡaiq. ²¹ Anjam kalil niŋgi queqnuḡ qaji di

ningi geregere tenemtoqnsib pegiyuqniy. Osib kumbra kalil dego pegiyuqnsib kumbra bole segi dauryuqniy. ²² Osib kumbra uge kalil uratoqniy.

²³ Qotei a are lawo qa utru. A na ningi torei aqa segi kumbra boleq di atqas. A nuŋgo mondor ti nuŋgo qunuŋ ti nuŋgo jejamu ti kalil taqate-soqnimqa ningi so bole gaigai sqab. Deqa mon-don gago Tamo Koba Yesus Kristus a olo lan qureq na bamqa ningi aqa ŋamgalaq di une saiqoji sqab. ²⁴ Qotei agi ningi metŋgej qaji a na ningi aqaryaingimqa inŋi bole kalil di nuŋgoq di bran-tqas. Qotei a gisaŋ tamo sai. Anjam kalil a mare-qnu qaji di a bole dauryeqnu.

²⁵ O ijo was, ningi iga qa Qotei pailyoqniy.

²⁶ Ningi na nuŋgo Kristen was kalil naŋgi segi kundoqnjriy. Kumbra di agi Qotei aqa tamo unŋasari naŋgi yeqnub.

²⁷ E Tamo Koba aqa ñam na ningi endegsi merŋwai. Ningi na Qotei aqa tamo unŋasari kalil naŋgi koroinjsib ijo anjam nenŋrenjonum qaji endi sisiyabqa naŋgi quqwab.

²⁸ Gago Tamo Koba Yesus Kristus a ningi qa are boleiyeme. Bole.

Yesus Aqa Anjam Bole 2014
The New Testament in the Anjam language of Papua
New Guinea, 2014 revision
Nupela Testamen long tokples Anjam long Niugini,
2014

copyright © 2014 Wycliffe Bible Translators, Inc.

Language: Anjam

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2016-04-28

PDF generated using Haiola and XeLaTeX on 21 Feb 2024 from source files dated 31 Aug 2023

0eb339dc-c20a-5065-9483-338933d97585